

Ego sum Alpha et Omega.  
Heb dalleth na diwedhva  
pur wir my yw,  
omma a-ji dhe'n kloudys,  
war fas an dour yn sertan,  
tri ferson yn unn dywses  
ow kesreynya bys vykken  
yn meur enor ha vertu.  
My ha'w Mab ha'n Spyrys Sans,  
tri yth on yn unn substans,  
komprehendys yn unn Dyw.

My yw henwys Dyw an Tas,  
ollgalloesek dres pub tra.  
Skon y fydh gwrys der ow ras  
nev, plas rial dhe'm trigva,  
ha'w thron-sedha ow bodh yw  
may fo henna.  
Ha'n nor ynwedh a-woeles  
skon orth kompas a vydh gwrys.  
Honna a vydh ow skavell droes  
rag ow plesour pup-prys,  
ha dhe'm enor maga ta.  
Nev omma yw gwrys genev,  
orth ow dywses yn sertan.  
Hag ynni y fydh gorrys  
neb a'm gordh gans joy ha kan.  
Naw ordyr eledh gloryus  
i a vydh, rial ha splann,  
kannasow dhymm dannvenys  
rag ow servya bys vykken.  
My a vynn may fons nevra.

Lemmyn pub Ordyr dh'y se  
my a vynn may fo gorrys,  
ha pub onan dh'y dhegre  
a vydh gorrys dhe'm servis  
pan vynnav vy kommondya.  
Omma nessa dhe'm tron vy  
an kynsa tri a vydh gwrys.  
Cherubyn, an ughella  
ty a vydh. Deus a-rag uskis;  
Serafyn, ynwedh Tronys.  
Ow gordhya oll hwi a wra,  
par dell yw ow bodh nevra,  
omma pub prys.  
Ha ty, Lusifer golow,  
yndella yw dha hanow.  
'Ugh pub el ty a ese'

An kynsa Ordyr ty yw.  
Gwayt ow gordhya war bub tu,  
dhiso jy par dell goettha.  
Y'n sekond degre y fydh gwrys  
tri Ordyr moy, yn sertan.  
Deus a-rag dhymm, Prynsipatys.  
Ty a 'sedh omma poran,  
Potestas y'n Barth arall,  
Domynashyon y'n tu ma,  
ow praysya hag ow lawdya  
dhe'm hanow nevra heb gil.  
A'n tressa degre a-woeles  
my a wra tri Ordyr moy.  
Argheledh, Ordyr pur vras,  
dewgh a-rag omma dhe vy,

ha Vertutys kekeffrys.

Ha'n eledh, y'n barth dheghow  
hwi a 'sedh omma heb gow.  
Dhymm y fydhowgh kannasow,  
hag a wrewgh ow arghadow  
gans joy bras ha kan pub prys.  
Lemmyn pan yw dhymmo gwrys  
nev ha nor orth bodh ow brys,  
ha'n naw ordyr kollenwys  
ha'n kynsa jorna spedys,  
my a's soen gans ow ganow,

hag a vynn diyskynna  
dhe'n nor yn-dann an kloudys,  
hag ow bodh guthyl ena  
my a vynn, may fo gwelys  
ow bosa Dyw heb parow.  
Lemmyn y'n sekond jorna  
gwrav Braster a-dhesempis.  
Y'n ebrenn eus a-wartha  
my a vynn bos golow gwrys  
hag ynwedh bos diberthva  
sur ynter an jydh ha'n nos.  
Ny fyll dhymm konduk a dra  
war an bys der ow galloes.  
An mor bras yn kott termyn  
a-dro dhe'm tir a vydh dres,  
rag y witha pur ylyn  
orth harlotri prest pub prys.

An tressa dydh my a wra

dhe'n gwydh sevel yn-ban,  
ha doen delyow teg ha da  
ha flourys hweg, yn sertan.  
Ow bolonjedh yw henna,  
may tokkons ynna pur splann  
frutys dhe'm bodh, rag maga  
seul a dheg bywnans hogen.  
Y'n peswara dydh bydh gwrys  
an howl ha'n loer yn tevri,  
ha'n ster ynwedh kekeffrys,  
rag gul golow vynari.  
An re ma yw fin gonedhys.  
Ow bennath y rov dhedha.  
Y'n pympes dydh, orth ow brys,  
an puskes, heb falladow,  
hag oll an ydhyn keffrys,  
my a's gwra dhe'm plegadow,  
hag oll an bestes y'n bys,  
gans pryves a bub sortow.  
An re ma yw oll teg gwrys.  
My a's soen warbarth, heb gow.

Peace, I say, oll eledh nev!  
Goslowewgh dhe vy lemmyn!  
Krysewgh ow bosa pryns krev,  
hag ynwedh dhy'hwi chyften,  
byghan ha bras.

Lusifer yw ow hanow,  
pennsevik yn nev omma.  
Ow howetha yw tanow.  
hwi a woer yn ta henna,  
ow bosav gwell es an Tas.

My yw lantern nev, ywis  
avel tan ow kolowi,  
moy splanna es an Drynses.  
Henna degewgh hwi dustuni,  
ow bosav pryns pur loryus.  
Oll gans owr ow terlentri  
yth esov, heb dout y'n kas.  
Splanna es an howl devri,  
hwi a yll warbarth gweles  
ow bosav, sertan pub prys.  
Ny vynnav orth el namoy

dos dhe'm stat marnas my.  
Henna yw ow thowl, devri.  
Maga fras ov avel Dyw.  
My a gommond war bub tu  
myns eus yn nev dhe'm gordhya.  
Eledh oll, hwi a glywas,  
pandr'a gewsowgh dhymm lemmyn?  
Dell nag o'ma polat bras?  
Gorthybewgh hwi oll, pub onan.  
Hwi a woer pyth o'ma.  
An Tas gallas alemma.  
My a dewl ny dheu omma  
bys vykken mara kallav.

Lusifer, ty yw henna  
sur a bass myns eus yn nev.  
Kreatys nobyl omma  
yth o'ta a natur krev,  
ha my a'n krys.  
Sur rakhenna dhe'th enora  
my a vynn, 'ugh an Drynses.

Ty greatur unkinda,  
erbynn dha Vaker ow kows!  
Prederi prag na wre'ta  
y feusta gwrys, ty was lows,  
gans Dyw omma?  
Ganso pan wres komparya  
meur dhe vlamya yth osta  
ha paynys y'fydh ragdho.

P'yw henna a vydh mar vold  
kows ger erbynn Lusifer?  
Here he has unto you told  
that in heaven is not his peer,  
ha my a'n kryes.  
Hwi a'n gwel ow terlentri  
splanna es an howl devri.  
My a'th enor, dhymm dell res.

A taw, na gows a henna  
my a'th pys; kryes ow lavar.  
Neb a'n formyas ev omma  
a'n deform arta, preder,  
y vodh pan vo.  
Mar trIgowgh hwi y'n kryjyans na  
moredh hwi a's bydh ragdho,  
trestyewgh dhodho.

Pynagoll yw a lavarro  
nag yw Lusifer wordhi  
omma dh'agan governa  
ha bos penn yn nev devri,

a lever gow:

eya, ha wordhi pub prys  
dhe vos yn tron esedhys  
avel Dyw, sur heb parow.  
My a'n gordh omma dell res,  
war ow dewlin kekeffrys,  
rag y vos mar garadow.

Dell wrama reynya omma  
yn tron 'wartha gans glori,  
hwi a 'sedh warbarth genev,  
myns a goello orthiv vy,  
poran ryb ow thenewenn.

I was mad-e of a thought.  
You may be glad of such wight,  
and in heav'n so gay y-wrought.  
Seemly am in every sight.  
Come up to me, everyone,  
hag y'n eur na gwrav assaya  
dhe vos mester war an tron.

Ty, Lusifer, unkinda  
meur yth os orth dha Vaker.  
Dout yth yw dhis rakhenna  
kavoes meur y dhisplesour,  
dell os wordhi dhe henna.  
Prag na wre'ta prederi  
y feusta formys, devri,

der y wrians ev omma?  
Der henna, preder yn ta.  
Ev a yll der er arta  
dhe'th dhistrui, 'skemunys.

Ty, Mighal, re stout yth os  
pan wres orthiv vy settya.  
My a grys hag a'n soppos  
y fynnses jy komparya  
lemmyn genev.  
Na wres, na wres, na borth dout,  
ty, nag oll dha gowetha.  
Mara kwredh, my a'gas klout.  
Rakhenna gwrewgh ow gordhya  
ha warbarth trestyewgh ynnov.  
Hwi a'm gwel ow terlentri  
splanna es an Tas devri.  
Henna krysewgh ow bosav.

A Lusifer. Lusifer,  
ty a veu oll lantern nev,  
ha dredhov sertan pub eur  
ty a veu eksaltys brav,  
hag a'th settyas pur ughel.

Lemmyn meur os unkinda  
orthiv vy pan wres settya.  
Rag dha woeth, dhe bayn nevra  
ty a wra diyskynna  
mayth elles isel.  
Determys ov dhe unn dra,



ha konkludys maga ta;  
dhe wuthyl unn den omma  
a dhor ha slim dhe'm servya,  
ha'th plas jy dhe opya,

rag kollenwel an roumys  
a vydh voyd yn nev uskis  
dredhos jy ha'th kowetha.

Ifarn ragos a vydh gwrys.  
Uskis kommondyav henna.  
Ena ty a vydh trigys,  
ha myns assentyas genes  
genes jy a'n naw ordyr.  
Yn paynys bys vynari  
heb ronson vydholl na fin,  
ena pub eur ow mornya  
rag galarow, bys worfenn,  
hwi a vydh, my a lever.

Ay! A vynn'ta jy orth mab-den  
pan vo gwrys a slim hager  
okkupy a rag sertan  
ow roum vy, na'n jeves peer  
omma yn nev?  
Henna 'via hager dra!  
Den a vynn'ta gul a bri  
dhe dhos omma dhe'n plas ma  
neb yw lenwys a glori?  
Ragdho wordhi nys yw ev!  
Na, na, ny vydh yndella.  
My a worthyp dhis henna.  
An plas sur lowr dhiworto

my a with hwath, re'm lowta,  
ha dhiworthis jy keffrys.  
Ty a'm gwel vy krev omma  
hwath pur brout ow trebuchya.  
Hanter an eledh genev vy  
assentys yth yns, syrra,  
dhe'm mentena yn spit dhis,  
dell wel'ta jy.  
For well nor woe  
I will not go.  
I say you so.  
This will not be,  
dhymmo vy krys.  
Rag my a omsyns  
sertan 'ugh peub myns  
a veu bythkweth hwath formys.

Taw, Lusifer milligys,  
y'n golonn dell os goethus.  
Rag skon ty a dhe baynys  
heb redempshyon, dhymmo krys,  
sur dhymmo krys.  
Oll dha splannder ha'th tekter  
y treyl skon dhis dhe hakter,  
ha meur euthek bileni.  
Mighal, pryns ow chevalri,  
ha'n eledh a'n ordyr naw,  
an rebellyans ma devri -  
dhe'n dor ganso, mester ha maw,  
dhe ifarn, hager drigva.

Ena trigens yn paynys,  
ha galarow meur pub prys,  
yn pur sertan rag nevra.

Deun warbarth, an naw ordyr!  
Helghyn yn-mes Lusifer  
a-dhesempis mes a'n nev.

Ty jett, gwrav dha eksamnya.  
Prag y fyynn Dyw ow dampnya,  
ha my mar wolow ha krev?

Rag dha vosta milligys  
hag y'n golonn re woethus.  
Der reson dhis my a brev.  
Ty fol, prag na bredersys  
a dhorn Dyw y feusta gwrys,  
ynwedh ganso eksaltys  
dres myns el yn nev 'sedhys  
omma yn y dron 'sedhys?

Even y'n tron mynnav 'sedha,  
ha'n keth plas mynnav gwitha  
hwath, yn spita dhis.  
Keffrys my ha'm kowetha  
der gledha a vynn tria  
ow bosav moy wordhi  
ages an Tas, sur, pub prys.

Warnedha, myns eus yn nev!  
Gwren yn kerdh y helghi eev  
dhe ifarn, dhe dewolgow.

Ha hwi oll y gowetha,  
kewgh yn kerdh ynwedh gansa!  
Kronkyewgh i gans kledhedhyow!

Out, ellas, gallas fasow!  
Yth esov yn tewolgow.  
Ny allav dos anodho.  
Yn pytt down yth ov tewlys,  
a-berth yn ifarn kelmys  
gans chayn, tan a-dro dhymmo.  
Kyn na'm boma lowena,  
yma lower 'skynnys genev  
a'n eledh sur dhe driga.

Gallas Lusifer, drog pryv,  
mes a'n nev dhe dewolgow.  
Ha lemmyn yn y le ev  
my a vynn heb falladow  
unn den formya  
yn vali Ebron, devri  
rag kollenwel yredi  
an le may teuth anodho.

Dell on ni onan ha tri  
Tas ha Mab yn Trinity,  
my a'th wra jy, den, a bri  
haval dh'agan fas hware,

hag a hwyth yn dha vodi  
spyrys, may halles bywa,  
ha'n bywnans pan y'n kelli  
dhe'n dor ty a dreyl arta.  
Adam, sav yn-bann yn klor,  
ha treyl dhe gig ha dhe woes.  
Preder my dhe'th wul a dhor,  
haval dhymm dhe'n penn ha troes.  
Myns eus yn tir hag yn mor,  
warnedha kemmer galloes.  
Yn sertan, rag dri askorr,  
ty a vyw may fita loes.  
Rag dha gerensa lemmyn  
my a vynn gul paradhis,  
plas delysyous dres eghenn.  
Rag ow flesour otta gwrys!

Lower flourys a bub eghenn,  
y'n plas ma otta tevys  
ha frutys war bub gwydhenn.  
Y tyv gwav ha hav keffrys.  
Ha lemmyn, war oll an plas  
my a wront dhis bos gwithyas,  
war bub frut, losow ha has  
dhe'th plesour, dhis my a as.

Saw bydh war dhymmo pub prys.  
A'n keth gwydhenn ma omma  
gwayt na vo gensi mellys;  
my a'th charj a-ugh pub tra.  
An wydhenn ma yw henwys  
Gwydhenn Godhvos Drog ha Da.  
Mar pydh hy frut hi tastyes  
ty a vydh dampnyes ragdho,  
ha sojet ankow dredho  
ty a vydh; preder henna.

Tra moredhek yw sertan  
gweles Adam y honan  
heb kowethas.

Adam, kosk dhejy lemmyn.  
Ahanas tenna asenn  
my a vynn, a'th tenewenn,  
hag a honna pur sertan  
my a vynn gul dhis pries.

Skon a onan dha asow  
my a wra dhiso parow  
pub eur dhis rag dha weres.

A, A, A, ow Arloedh da!  
Benyn hi a vydh henwys.  
A'm korf vy gwrussys honna:  
Eva a'm asenn yw gwrys.

Ragdho yth os bennigys!

Adam, otta an puskes,  
ydhyn y'n ayr, ha bestes  
kekeffrys yn tir ha mor:  
Ro dhedha aga henwyn;  
i a dheu dhe'th worhemmynn,  
saw na vegh i war neb kor.

Yth hanwav bugh ha tarow.  
Oll an chatel dibarow  
aga henwyn kemmerens,  
margh ha kasek hag asyn,  
ki ha kath ha logosenn,  
dyffrans ydhyn ha serpons.

Y rov henwyn dhe'n puskes,  
siwyon, penngarnes, syllies;  
my a's reken oll diblans.

Rag bones oll teg ha da  
yn hwegh dydh myns eus formys,  
aga soena my a wra,  
may fo'n seythves dydh henwys  
an dydh sur a bowesva  
a bub den a vo selwys.  
Yn diskwedhyans a henna  
my a bowes desempis.

Gallas genev hager dowl  
dhe bytt ifarn mes a'n nev.  
Ena my a dhug an rewl,  
ha lemmyn yn payn pur grev  
yth esov, a dhur nevra.  
Nyns eus dhymmo remedi.  
An trespass yth o mar vras.  
Ny amont hwilas mersi.  
My a woer na vynn an Tas  
ow foli dhymmo gava.

Rakhenna, oll an venjans  
a allav dhe brederi  
my a vynn gonis dehwans  
der neb for' a vras envi.  
Ny wrav vri erbynn p'ywa.  
My a woer yma formys  
gans an Tas unn den a bri.  
Haval dhodho yth yw gwrys,  
oll y gorf yn pur semli.  
Ny allav perthi henna.  
Envius ov er y bynn.  
My a vynn tewlel neb jynn  
dh'y doella, mara kallav.

Gans Dyw yth yw apoyntys  
warden war oll paradhis.  
Der henna yth ov grevys,  
y weles ev eksaltys,



ha my dres dhe iselder.  
Dhe henna yma gwre'ti,  
benyn yw henwys Eva.  
Gwrys a'y asenn y feu hi,  
marthys teg a-ugh pub tra,  
saw hy skians yw brottel.  
My a vynn, mara kallav,  
hwilas neb for' dh'y themptya,  
par dell oma gwas sotel.  
Now Adam 'ma ow lordya  
avel dug yn paradhys,  
ha my sevelyek omma  
yn ifarn yn tan, pup-prys  
yn poethvann bras ow leski.  
Saw an keth Adam yw gwrys  
my a woer heb dout y'n kas,  
dhe gollenwel an roumys  
eus yn nev der ow goeth bras  
yw voyd dredhov ha'w meni.  
Saw mar kallav, der dhevis,  
gul dhe Adam dhymm koela,  
my an drosa dhe baynys,  
na dheffa dhe'n nev nevra,  
mara mynna dhymm koela.  
Saw Eva mynnav 'ssaya.  
Hi yw esya dhe doella  
es Adam, yn gwir yn ta,  
ha moy sempel.  
Ynwedh ny dal dhymm bos gwelys  
ow honan y'n keth shap me.  
Hager yth ov difashes,  
ny yll tra bones hakkra.  
Hwi oll a'm gwel.

Hager lowr os, my a'n 'vow.  
Yn mysk oll an dhewolow  
nyns eus hakkra.

Rakhenna hwila neb jynn,  
po an viaj ny dal oy.  
Eva, dhis a dhegren  
mar euthek pan wello hi  
dha figur y'n keth dell ma.  
Ha mar kwreta bargaen sur  
ty a vydh lower enorys  
awos Dyw, kynth ywa fur.  
Yn for' ma mar pydh toellys  
my a vydh kompes ganso.

Na borth dout, my a'n prevent,  
ha'ga dri lowr dhe baynys.  
My a lever dhis fatla.

An Tas a wrug der entent,  
yn mysk oll pryves y'n bys,  
formya pryv henwys serpont;  
hag yth yw wondrys fashes,  
dhe virgin deg pur haval.  
Sotel yth yw gans henna,  
a-ugh best na pryv y'n bys.  
Yn henna mynnav entra,  
ha privedh dhe baradhis  
my a vynn mos heb fyllel.  
Kyn na woer hi kows banna

my a's rewl hi dell vynnav,  
ha kyns es dos alena  
dhe Adam ha dhe Eva  
my a wra neb anfeusi.

Gwra yndella, my a'th pys,  
par dell osta jowl wili.  
Mar kwredh henna, enorys  
ty a vydh bys vynari,  
ha penn rewler warnan ni  
heb dout y'n kas.

By and by thou shalt see that;  
ha pur uskis gwrav an pratt  
dhe'n serpont, yn spit dh'y fas.

Ay! Re debel-diwetthi!  
Gorta ha bydh dhymm rewlys!  
Gas vy dhe entra a-ji,  
rag ty ny vydhydh doutys  
drefenn dha vosta mar deg.

Ty a vydh yntertaynys  
ha gans Eva sur krysys.  
Dha fisment dhedhi a bleg.  
A-ban oma klos entrys  
ynnys jy a-barth a-ji,  
ow voys oll otta chanjyes,

avel maghteth yn tevri.  
My ny vydhav konvedhys  
ow bos ynnov falsuri;  
sotel lowr ov, my a grys

hag a vynn mos, heb gul gik,  
y'n wydhenn pur smodh, heb mik,  
avel el hweg afynys.

My a vynn mos dhe wandra  
omma yn mysk an flourys.  
Oll pub plesour a'n bys ma  
y'n plas ma otta tevys,  
mayth yw konfort dhe weles.

Eva, prag na dheu'ta nes,  
rag kows orthiv ha talkya?  
Unn dra a wonn a'm godhvos -  
pur lowenek a'm gwressa  
koela orthiv a mynnes.

Piw osta jy eus y'n wydhenn  
a-wartha gans tros ha kan?  
Marth yw genev dhe'th klywes.  
Orthis my ny'm beus negys,

h'a byle os devedhys.  
Marth yw genev dha weles.

Na gemmer marth vydh, benyn 'vas.  
My a dheuth a-dhiwedhes  
mes a'n nev gans hast pur vras,  
rag kewsel dhis a henna  
omma lemmyn pur brivedh.  
My a'th pys, awos neb tra  
na gemmer marth anodho,  
nag own vydh orth ow gweles.

Nyns eus own dhymm ahanas,  
drefenn bos mar deg dha fas,  
na hwath dout vydholl y'n bys,  
rag der dha er yth 'valsa  
ty dhe dhos a'n nev toeth-ta,  
ha mara teudh alena  
pur wolkomm yth os genev,  
ha dhe well y'th fydh kresys.  
Lavar dhymmo dha negys,  
ha mar kallav dha weres,  
na borth dout, ny vydh neghys.

Ow negys a dreyll dha les  
mara mynn'ta ow krysi  
saw yma dhymm ahanas  
dout pur vras a anfeusi  
mara kwres ow diskev'ra.

Na vynnav dha dhiskev'ra,  
ow hothman, a dra y'n bys.  
Rakhenna, meur dha volder,  
ty a yll gul dha negys,  
hag ow threst yw y vos da.

Da koedh, yw. Na dhout peryl  
war ow honesty, benyn 'vas.  
Poken y hwrussen fyllel,  
hag y fia pegh pur vras  
ha my gwiw dhe vos punshys.

Hwi a lever gwir, dremas.  
Henna 'via hager dra.  
Yma dhymmo hireth bras  
rag godhvos pandr'a via!  
Yn kott termyn agas negys  
kewsewgh, y praydha.

My a lever dhis, Eva,  
ha koel orthiv 'wos eghenn.  
Maga fur ty a via,  
avel Dyw eus a-wartha,  
hag a wodhvia pub tra.

Mighal! Syrra, dhywgh gromersi!  
A kallen dos dhe'n prykk na  
y halsen bos pur veri.  
Henna 'via rial dra,  
bos koth dhe Dhyw a-wartha  
hag yn pub poynt ekwal ganso,  
ha maga fur akontys.

Y'n eur na, re Sen Devri,  
y hallsen routya pur gay,  
ha bos statly dhe'm devis.  
Y praydha, lavar fatla.  
Perthi ny allav pella!  
My a vydh sur dhe lakka  
mes ty dhymm a lavara  
yn by and by.

Skians benyn yw brottal,  
ha my nys ov over-sotel.  
Lavar dhymm kyns es hedhi,  
my a'th pys, an nowedhys!

My a lever dhis, Eva,  
mar kwredh tastya an frut ma  
eus omma war an wydhenn,  
maga fur ty a via  
avel Dyw eus a-wartha  
yn nev ughel a-ughon.  
Gow vydh ny lavarav.

What! Yw henna dha dhevis!  
Tamm vydh ny vydh kresys  
henna, my a lever dhis.  
Dhe'th kusulyow y'n poynt na,  
my a lever dhis praga.  
Dyw a or'nas kontrari  
na dheffen tastya henna.  
Ha'y gommondment pur dhevri  
a ros straitly, dres pub tra

na wrellen mellya worti.  
Prag y hwredh genev flattra?

Goslow, goslow, Eva, ha deus nes;  
sham yw genev dha glywes  
ow krysi dhe'n geryow na.  
Praga, my a lever dhis,  
y hwrug Dyw ri an charj na?  
Genes a peva tastyes,  
maga fur ty a via  
yn pub poynt sur avello.  
An Tas, ev ny vynnsa sur  
orth den vydholl bos mar fur  
dhe wodhvos a dhrog ha da.  
Rag henna, benyn 'vas Eva,  
genes ny vynnav flattra  
na ny vynnav usya gow.

Koel jy dhymm, men dhe geski,  
mar mynnta bos eksaltys,  
poken sertan vynari  
hwi a vydh avel flegthes.  
Bo yn assentys ty a glyw,  
Eva jentyl.

Eya, eya, my a glyw.  
Hag y ros dhyn charj mar strait,  
ma'n bydh payn ha galarow  
mara kwren terri unn jet  
y gommondement dhyn res.  
Par happ yn ifarn nevra



ni a'n bydh agan trigva,  
mar ny vydh y vodh sywyes.

Taw, taw, Eva, yth os fol;  
ny vynnydh koela orth da.  
My a ragdho; ty a'n oel  
ow husul mar kwredh nagha.  
Genes nyns ov kontentys.  
Na vea my dhe'th kara,  
ny vynnusen dhe'th kusulya  
dhe vos bargin mar vras gwrys.

A kothven y vosa gwir,  
my a sywsa dha dhesir  
drefenn ty dhe dhos a'n nev.

Hwi a lever gwir, benyn 'vas.  
Ny res dhywgh ow mystrestya:  
a'n nev ny dheu mes tus vas;  
my yw onan a'n sort na.

Rewgh hwi rann dh'agas dremas,  
po an viaj ny dal tra,  
ma's y bart ev a'n jeffa

Ny vynnav bos mar grefni  
dhe witha oll ow honan.  
Adam sur dres pub huni  
my a'n kar, po Dyw difenn  
dhe witha heb y shara.

My a ystynn an skorrenn;  
kemmer an frut anedhi.

My a wra yn pur sertan.  
Ny allav nep-pell perthi,  
pan vo res tastya anedhi.

Nevra ny gemmer dout,  
ty a yll bos pur veri.  
Gans dha lagasow a-les  
ty a wel pub tra omma,  
ha pur fur ty a vydh gwrys,  
avel Dyw; na dhout henna,  
Eva, my a lever dhis.  
Na vea my dhe'th kara,  
ny vynnusen awos neb tra  
yn-bann dha vos eksaltys.

Meur a ras dhy'hwi, syrra,  
ow ri kusul dhymm mar stout.  
Orthowgh my a vynn koela,  
ha, by God, nys eus dhymm dout  
dhe dastya an keth aval.  
Ha'w dremas a woer dhymm gras  
dhe wul viaj mar nobyl,  
ha, re Dhyw an Drynses Tas,  
ev a'm sett yn-bann ughel,  
hag a'm gormel meur, heb dout.

Ke yn kerdh, Eva benyn 'vas,

ty a yll godhvos dhymm gras  
rag an vyaj.

Hag Adam, dell yw dremas,  
ahanas a wra pur vras.  
A'n bargaen ny vydh edrek.

Farwel, ow hothman a'n nev;  
My a'th kar bys vynari.  
Dhe Adam kerdhes pur grev  
my a vynn, dh'y salusi,  
ha'n aval y bresentya.

Gwra yndella, my a'th pys.  
Ty a glyw ken nowodhow  
kyns ow gweles vy arta.

Adam, Adam, pyth es'ta?  
Goslow dhymmo ha deus nes.  
Yma genev dhe'th plesya -  
Na borth dout a bratt eus gwrys  
may hwodhves dhymm grasow.

Wolkomm, Eva, os, benyn 'vas.  
Mars yw an nowodhow da  
ty a vydh rewardys,  
ha'm kolonn ynwedh ganso  
ty a vydh prest dhe'th plegadow.

Mirewgh, mirewgh orth hemma!  
'Tomma, gay a aval dhis!  
Mar kwredh tastya anodho  
ev a dreyll dhisso dhe les,  
moy es milyow a beunsow.

Deus nes. Gas vy dhe weles  
maras ywa aval da.  
Lavar ple feva kevys.

Praga, Adam ow fries,  
dar, dout eus dhis y weles?  
Lavar dhymmo, my a'th pys.

Ny bleg dhymm syght anodho  
dout pur vras yma dhymmo  
nag ywa 'vas, my a grys.  
Ty, mar pe hemma terrys  
mes a'n wydhenn difennys  
ragdho my a vydh grevys.

Nevra na dhout a henna,  
Adam hweg, ow herensa.  
My a lever, dhis mar pleg,  
yn pan vaner y'n beuma.  
Syrre, ha my ow kwandra,  
my a glywas a-wartha  
war an wydhenn unn el hweg

sur ow kana.

My a'm beu wondrys fansi  
orth y weles y'n wydhenn.  
Ha dhe-vy yn kortesi  
y profyas, avel kothman,  
meur a daklow, re'm lowta,  
ha pur wordhi.

A Ev', Ev', ty a fyllis,  
ow koela orth an el na.  
Drog polat o, my a grys,  
neb a glywsys ow kana,  
ha'th kusulyas dhe derri  
an aval na.

Syrre,  
ev a gewsys dhymm mar deg,  
ny wodhyen tamm y nagha,  
ha'y bromys o mar hweg,  
may hwrug ev dhymmo koela.  
Ny dhoutis, war ow ena,  
a falsuri.  
Ha'y bromys yth o larjya!  
mar kwren tastya an frut na  
avel Dyw ny a via  
ha maga fur.  
My a fylli y'n eur na.  
A kallen dos dhe'n prykk na  
y fia bargaen pur fur.

A, out, out warnas Eva!  
My a yll kussya henna!  
Tewlys on ni dhe veshyf bras,  
ha wordhi dhe gemmeres.

Henna o hager vargen,  
Eva, my a lever dhis.  
Nebes lowr a vydh an gwayn  
pan vo genes kowl komptys.  
Soweth, ellas!

Taw, Adam. Na vydh serrys.  
Ny dheuth drog hwath anodho.  
An keth peryll y toutis,  
hag a leveris dhodho  
oll an peryll yn pub poynt  
saw ev dhymm a warrantyas  
nag o dhymmo dout y'n kas,  
war y beryll, wondrys koynt.

A, molleth dhe'n horsen kamm,  
ha dhe'jy ynwedh ganso!  
Ni a'n jevydh sur droglamm  
rag dha viaj y'n torn ma,  
ha wordhi dhe gavoës blam.

Ye, ye, my a'n jevydh oll an blam  
dhiworthis jy lemmyn Adam,  
pynagoll fordh yth a an gam.  
Saw a pen ni dywow gwrys  
ny vies malbew serrys,

my a woer henna yn ta.

Taw, taw, na vydh dhymmo mar wokki.  
An serpont o re wili  
ragos jy y'n keth torn ma.  
Ev a brofyas lowr gow dhis,  
ha genes ymons krysyes.  
Ow geryow a vydh prevys  
may fydh lowr payn ragdho.

Ye, yth osta jy den fur,  
ny vynes orthiv koela.  
Mar ny vydhav ow desir  
nevra ny'm gwelydh omma,  
medhav, unn spys.

An el esa y'n wydhenn  
y kewsis geryow efan,  
ha my a'n krys.  
Syrr, war nebes lavarow,  
tast jy part a'n avalow,  
po ow herensa ty a gyll.

Mir, kemmer an aval teg  
po sur ynter ty ha'th wreg  
an gerensa kwit a fyll,  
mar ny vynnydh y dhybri.

Henna yth yw truedh dra,  
a-ban res dhymmo koela

po kelli an gerensa  
eus ord'nys ynter-ranna.

Eva jentyl, na vydh serrys.  
My a wra oll dell vynni.  
Dro-va dhymmo desempis,  
ha my a wra y dhybri.

Eya, gwra dhymm yndella.  
'Dra vyn byw ow herensa  
ty a vydh bys vynari.  
Mir an aval ma omma.  
Kemmer ha deber toeth da,  
dout my genes dhe serri.

Ogh, ogh, tru, my re beghas,  
ha re dorras an difenn!  
A, debel venyn heb gras,  
ty re'm toellas vy heb ken!  
Agan korfow noeth gallas.  
Mir warnan pub tenewenn!  
Omgwetthyn ni gans del glas  
agan privyta pur glos.  
Y hwonn gwir. Dyw agan Tas  
y sorr dhyn y teg pur vras,  
my a'n soppos.

Mir, mir, a'n gwel'ta, Eva?



Yma ev ow tos omma.  
Rag meth, deun ni alemma  
dhe gudha yn tyller klos.

Adam, Adam, pandr'a wredh?  
Prag ny dheudh dhe'm wolkomma?

Drefenn ow bos noeth heb kweth,  
ragos yth yth dhe gudha  
y'n tyller ma.

Piw a dhisgwedhas dhis  
dha vos noeth treys, korf ha bregh,  
lemmyn an frut gras na'th fo  
mones dhe dhybri heb pegh?  
Prag y hwruss'ta yndella?

Dhymmo vy hwi a ros gwreg.  
Honna yw oll dhe vlanya.  
Hi a dorras an aval teg  
hag a'n dros dhymm dhe dastya.

A-ban goels'ta orti hi,  
ha guthyl dres ow difenn,  
yn hwys lavur dhe dhybri  
ty a wra bys y'th worfenn.  
Eva, prag y hwruss'ta jy  
toella dha bries heb ken?

An serpont der falsuri  
a'm temptyas dhe wuthyl henna,  
hag a bromsysas dhe vy  
y fedhen dhe well nevra.  
Hemma yw gwir.

Rag ty dhe goela orto,  
ha toella dha bries lel,  
nevra gostydh dh'y gorti  
my a orden bos benyn.  
Trest jy dhe'm ger.  
May foghho y lavur hi  
der wul ow gorhemmynn trogh,  
na heb meur lavur devri  
bynytha ny's tevydh flogh.

Prag y hwruss'ta, milligys,  
lavar, aga thoella i?

My a lever dhis an kas:  
rag bos dhedha joy mar vras,  
ha my pub eur ow leski.

Serpont, rag aga themptya,  
meur a bayn eus dhis or'nys.  
Milligys os dres pub tra,  
ha dres pryv ha best y'n bys.  
Own ahanas rag nevra  
den a'n jevydh prest pub prys.  
Ha ty, pryv, a wra kreupya,

ha slynkya war dor a-hys.  
Ynter hy has hi ha ty  
my a wra envi nevra,  
ha henna dhe'th penn dhejy  
dhe'n dor sur a wra kropya.

Ottomma hager viaj,  
may hallav kyni "Ellas".  
Yth ombrevis gwann diek,  
mayth ov 'poyntys dhe bayn bras,  
dhe bytt ifarn, ow chyf plas.

My a vynn dalleth kreupya,  
ha slynkya war dor a-hys.  
Dhe'm shap ow honan ottomma  
hwi a wel, oma treyllys,  
drog polat ha bras.  
Kyn na'm bo-ma lowena,  
an chorl Adam, hag Eva,  
dhe ifarn y tons dhymmo,  
ha'ga yssew, rag nevra,  
'poyntys der anow an Tas.

Ha'n serpont triges ena.  
Nevra ny dheu alena,  
rag yth yw milligys bras.

A Das, Dyw y'th wolowys,  
a-ban ov dhe dhrog tewlys,  
gront dhe'th kreatur, my a'th pys,

nep part a Oyl a Versi.

Adam, kyns es diwedh an bys  
my a wront Oyl Mersi dhis,  
ha dhe Eva dhe'th wre'ti.  
Saw, pur wir, dhymmo vy krys,  
orth dha wreg drefenn koela,  
rag terri an keth frutys  
a wrug difenn dhiworthis,  
spern y teg dhymm ha spedhas,  
ha'n erbys a'n keth dor na  
ty a dheber yn dha hwys  
dhe'th vara, pur wir nevra,  
erna ves arta treyllys.  
An keth dor kyns a wruga.  
A dhoust omma y feus gwrys,  
ha dhe dhoust yth edh arta.

Dha vodh re bo kollenwys,  
Arloedh Nev ha'n Bys keffrys.  
My a yll bos lowenhes,  
kyns es bos diwedh an bys,  
kavoes an Oyl a Versi.  
Kynth yw paynys ow kortos  
yn ifarn yn neb plas,  
ni yw neb a'n dendilas  
drefenn an difenn terri.

Mighal, yskynnewgh, el splann,  
helghyewgh Adam gans kledha dan,

ha'y wreg, mes a baradhis.  
Ha dew gweith dhedha gwra doen,  
dh'aga hudha pub seson,  
aga noetha na vo gwelys.

Arloedh, my a wra henna.  
Parys yw genev pub tra  
dhe vos dhedha alemma.

Adam, ke yn-mes a'n wlas,  
dhe gres an bys dhe vywa;  
ty dha honan dhe balas,  
dha wreg genes dhe nedha.

Adam, ottomma dillas,  
hag Eva, dh'agas kwetha.  
Fistenewgh, bedhens gwiskys.  
Fistenewgh troha'n daras,  
rag omma ny wrewgh triga.  
Agas toulys dhe balas,  
ha'gas pygans dhe nedha  
ottens parys.

My yw kannas Dyw, Ankow,  
omma dredho apoyntys.  
Rag terri gor'mynnadow  
dhe Adam gans Dyw or'nys,  
ev a verow, ha'y yssew.  
Yndella yth yw 'poyntys  
dhe vyny a vywo y'n bys  
my dhe ladha gans ow gyw.

Adam na Eva peggha  
ha difenn an Tas terri,  
mernans ny wrussens tastya  
mes yn plesour vynari  
i a wrussa prest bywa.  
Omma ev yth o 'poyntys  
chyf warden war baradhis,  
ha der beggh ha kovaytys  
oll y joy yth yw kellys,  
may fedha paynys ragdho.  
Gans an jowl y fons toellys  
der an serpont milligys,  
dell welsowgh warbarth omma.

Henna yth yw truedh bras,  
der an serpont milligys  
ni dhe vones mar wokki  
mayth yw kellys dhyn an plas  
o or'nys dhyn, leun a joy,  
dhe vywa omma nevra.

Lemmyn, Eva ow fries,  
henna yth o dha foli jy.  
Rakhenna paynys pur vras  
yma or'nys ragon ni,  
may hyllyn kyni dredha

My ny wodhyen gul dhodho.  
Kemmys geryow teg a'm prev.  
Der henna, war ow ena,  
my a sopposyas el nev

yth ova dannvenys dhymm.  
Syrra, kyn foma kregys,  
y flattering o mar loryus  
ny wodhyen guthyl nahen  
re'm lel lowta.

A, soweth, ty dhe grysi  
dhe'n jowl bras ha'y anfeusi!  
Rag yth o ev re wili  
pan edh y'n serpont a-ji  
rag dha doella.

A-ban oma kowl diglos  
hag a baradhis helghys,  
my a vynn dalleth palas  
rag kavoes sosten ha boes  
dhymmo vy ha dhe'n fleghes,  
hag aparel a dhillas.

Ynwedh my a vynn nedha,  
rag gul dillas dhe'm kudha  
ha dhe'm fleghes eus genys.

Ellas, gwev pan ova genys,  
ow terri gor'mynnadow Dyw!  
Helghys on a baradhis  
dhe'n norvys, er agan gew.  
Tra vydholl a wrella les  
ny gavav omma neb tu,  
na sosten, moy es bestes.  
Fatell wren omwitha byw?

Nyns yw hemma paradhys,  
a, nag yw, Adam, nag yw!  
Ena yth esa flourys  
ha frutys, teg aga liw,  
dh'agan maga,  
orta mires pan wrellen.  
Chanjyes yw an rewl lemmyn;  
ellas orth an pryv koela!

Dew vab yma dhymm genys,  
ha tevys yth yns dhe dus.  
Hwi oll a's gwel.  
Kaym yth yw ow mab kottha,  
Abel yw ow mab yonka,  
flegthes uvel ha jentyl.

My a vynn dhy'hwi 'poyntya  
servis dhe'n eyl ha'y gila,  
rag rewlya ys ha chatel.  
Kaym, dha jarj jy a vydh  
war gergh, barlys ha gwaneth,  
dhe wuthyl an dega lel

hag Abel, an oblashyon  
war an bestes ha'n oghen,  
ha'n devesyow oll y'n gwel.



Ha pan vo res degevi  
gorrewgh i dhe'n Mont Tabor,  
hag ena gwrewgh aga leski,  
dout Dyw genowgh dhe serri  
mar ny wren oblashyon lel.

Adam, ow thas karadow,  
my a wra heb falladow  
dha worhemmynn yn tien.  
Res yw, porres lavurya  
ha gonis y'n bys omma  
dhe gavoës dhyn ni sosten.

Mos dhe'n menydh my a vynn  
ha gul an dega lemmyn,  
ha leski homma pur glan.

Ha'n degves oll a bub tra,  
oblashyon sur anodho,  
my a'n dyllo oll gans tan.

Y leski ny vynnav vy,  
an ys na'n frutys devri.  
Taw, Abel, dhymmo, penn-koeg!  
My a guntell dreyn ha spern  
ha glos dhe leski heb bern,  
hag a wra bush bras a vog.

Kaym, nys yw henna gwrys 'vas.

Yn gordhyans dhe Dhyw an Tas,  
gwren agan sakrifis lel.  
Dyw a dhervynn bos gordhys  
gans an gwella frut pub prys.  
My a'n gwra, awos merwel.  
Kaym, ow broder,  
mir ha preder.  
Hemma yw mog hweg.

Taw, dhe'th kregi!  
Hemma yw gwell devri  
ty fol krodhek.

Ny yll bos,  
pan wredh gans glos  
dha sakrifis.

Re Dhyw a'm ros,  
mynnsen dha vos  
ughel kregys!  
Rag erya, sur er ow fynn,  
my a'th wysk, harlot jowdyn,  
mayth omhwelli dhe'th kilbenn!

Kemmer henna,  
ty blos adla,  
war an challa  
gans eskern an challa!

A tru, ellas!  
Ty re'm ladhas,

Kaym, ow broder.  
Y'n bys ma rag dha wrians  
ty a berth sur gessydhyans;  
ken na breder.

Otta marow, horsen chorl!  
Ny vynnav bos kontrolys.  
He is now rid out of the world.  
Y fynnsen y vos kudhys  
yn neb toll ke.

An gwas a vynnsa leski  
agan ysow, yn tevri.  
Ni yllyn perthi henna.  
Dhe Dhyw nys eus edhomm vydh  
awos kavoes agan pyth,  
my a woer gwir.  
Ow thas, kyn fo-va serrys  
pan glywo an nowedhys  
y vos ledhys, my, yw er,  
ny synsav poynt.  
Mirewgh py'mava tewlys,  
yn kledh dhe vones pedrys!  
Ny'm beus edrek vydh y'n bys,  
a'w dorn kynth ywa ledhys  
par dell oma gwikor koynt.

Kaym, dhymmo, py'ma Abel?  
Ow gorthybi uskis gwra.

Ny wonn, Arloedh, diogel.  
Henna ty a woer yn ta.  
My nyns ov warden dhodho.  
Perhaps, bleydh, so mote I go,  
a'n ladhas pols alemma,  
an harlot plos.  
Koth yw ev hag avleythys.  
Pan na yll e omweres,  
y vaw ny vynnav bos.

Otta, voys mernans Abel  
dha vroder, prest ow kelwel  
a'n dor warnas pub tyller.  
Milligys nevra re bi;  
hag oll an tir a biwvi  
yw milligys y'th ober.  
Frut da bynner re dhokko,  
na dader arall neb prys.  
Ow molleth y rov dhis;  
molleth ow Mab ha'w Spyrys  
dhis kemmer.

Dha voys, Arloedh a glywav,  
saw dha fas my ny welav,  
sur er ow gew.  
Moy yw ow gwann oberow  
hag ynwedh ow feghosow  
es dell yw dha versi, Dyw,  
dhymm dhe ava.

Lemmyn difreth ov ha gwag,  
pur wir dres oll tus an bys.  
My ny wonn leverel prag  
gans peub na vydhav ledhys  
ewn rag an keth ober ma.

Kaym, na vydhdydh yndella  
rag dha ladha den mar kwra  
ev a'n jevydh seyth kemmys.

Token warnas my a wra.  
Henna gwelys pan vova  
ny vydhdydh gans den tochys.

My a vynn mos dhe'm syrra,  
dhe weles pana fara  
a wra ev a'n nowedhys.  
Now God speda dhis, ow thas.  
My a wrug oblashyon bras,  
hag a loskas showr a ys.

Henna yth o gwrys pur dha.  
Py'ma Abel, kows henna:  
dar, nag ywa devedhys?

Anodho mars eus preder,  
orth y withyas govynn e.  
A wrug kelli y vroder?  
My a'n syns gweth es boekka;

Ny wonn pyth eth dhe wandra.

Hemma yth yw gorthyp skav.  
Yma ow kul ow holonn klav  
orth dha glywes y'n torn ma.  
Ty re'n ladhas, re'm lowta!  
Ow molleth dhis rakhenna,  
ha molleth dha vamm ganso  
ty a'fydh sur maga ta.  
An nowodhow pan glywvo  
hy holonn terri a wra.  
Emskemunys dell o'ta,  
kwykk yn kerdh ke alemma.  
Ny borthav gwel ahanas,  
rag kavow sevel a'm sav.  
War dhor lemmyn omhwelav.  
Ow holonn 'ter dew gallas.

Emskemunys lowr yth ov,  
nyns yw res 'skemunya moy.  
Ny'th anniav, perth jy kov,  
nag ow dama, yn tevri.  
My a vynn kyns es hedhi  
mos alemma  
ha gwandra a-dro y'n pow.  
Kemmys yw an mollothow  
dout yw dhymm kavoes trigva.

Adam, pandr'a hwer dhy'hwi,  
yndellma bones serrys?

Yn ow holonn pur dhevri  
yth oma pur dughanhes  
orth dha weles y'n stat ma.

A Eva, ow fries ker,  
ow holonn yw ogas trogh.  
Oll ow joy yth yw pur wir  
kellys, der mernans ow flogh  
neb a geryn an moyha.

Syrra, ny wonn konvedhes  
agas dughan yn neb for'.  
Agan dew vab, dhe Dhyw gras,  
yth ens pur vyw - bydh na sorr -  
hwath nyns yw pell.  
Kaym hag Abel, ty a woer,  
or'nys yns dhe Mont Tabor  
dhe wul offrynn, diogel.  
Ha mir, Kaym otta ena,  
devedhys dhe dre toeth ta.  
Rag henna sav, y praydha,  
ha gas kavow dhe wandra.  
My ny brederav gwell for'.

Eva, nyns yw dhe geles  
an ober ma dhe weles.  
Ledhys yw Abel. Na sorr!

P'ywa? Abel yw ledhys!  
Dyw difenn y vosa gwir!  
Nyns eus den vydholl y'n bys  
dhe wuthyl an keth murder,  
mes ty ha'w mab kottha Kaym.

A, gans Kaym emskemunys  
ow mab Abel yw ledhys,  
mayth ov genys dhe veur bayn.  
Sorr Dyw ha trobel pub tu  
yma pub eur ow kressya  
y'n bys ma. Hedra vyn byw  
ov sur y hwra paynya.  
Ny'm beus joy a dra y'n bys.

Out, ells, pandr'a vydh gwrys?  
Hemma yw yeyn nowodhow.  
Ow holonn yth yw terrys;  
Fynnsen ow bosav marow.  
Soweth bythkweth bos formys!

A, ty Kaym, emskemunys,  
ow molleth dhiso pub prys!  
Henna o gwann-ober gwrys,  
may ma Dyw ha'n nor keffrys  
warnas pub eur ow kria.  
Rakhenna, wosa hemma,  
nevra ny wren rejoysya,  
mes pub eur oll ow mornya  
heb joy vydh na lowena  
der dha wann-ober omma.  
Rakhenna voyd alemma,  
na hwila agan 'nia,



mab mollothow par dell os.  
Ow molleth dhiso pub prys,  
ha molleth dha das keffrys  
ty a'fydh y'n jydha ha'n nos.

My ny wrav vri a henna.  
My a lever dhis, dama,  
kemmys mollothow omma,  
my a woer! Ny sewenav  
nevra y'n bys.  
Rakhenna mos alemma  
my a vynn; ny wonn py le.  
Malbew edrek eus dhymmo  
an chorl Abel 'wos ladha,  
rag bythkweth my ny'n kerys.  
Avoydyama.

Kuntell warbarth ow fygans:  
my a vynn mos pur uskis  
ha wosa hemma dihwans,  
pell y'n difeyth dhe wandra.

A Kaym, Kaym, ow fries ker,  
ty a wrug pur dhrog ober  
dhe ladha Abel, den da.

Dha own vroder yth ova,  
ha'w broder vy maga ta.  
Rag henna erbynn kinda  
yth o dhis mos dh'y ladha.  
Sorr Dyw yma dhyn ragdho.

Tetivali! Bramm an gath!  
Nyns eus edrek dhymmo hwath  
awos an keth ober na.

Ow fries, gwellha dha jer.  
Gas dha oela ha'th usa.  
Gwren grassa dh'agan maker  
a'gan lavur y'n bys ma;  
ni a'n dendilas, ha moy.  
Rakhenna, wosa hemma,  
yn chast gwren ni kesvywa;  
ha carnal joy y'n bys ma  
ni a vynn warbarth nagha,  
der vodh an Tas a Versi.

Adam, na wredh yndella  
bywa y'n keth ordyr na.  
Dha has a wra ynkressya  
heb nomber dhe akontya.  
Yndella yth yw apoyntys.  
Ty a 'fydh mab dineythys  
a'th korf sur, na wra doutya.  
Henna a vydh haval dhis  
na yll den bos havalla,  
ha genev y fydh kerys.

Arloedh, bennigys re bi,  
orth ow gwarnya yndella.  
Dha volonjedh pur dhevri  
re bo kollenwys nevra.

Kalmana ow hwoer, fisten,  
gas ni dhe vos alemma,  
rag nans yw hi prys yn tien  
mayth yw res yn kerdh vyajya.  
Degyn genen agan pygans,  
par dell osta ow fries  
ha'w hwoer a-barth mamm ha tas.  
Gallas genev sorr an Tas  
rag ladha Abel penn-bras,  
ynwedh molleth mamm ha tas  
res yw dhymmo, moy es kans.

A, Kaym, ty a fyllis meur  
rag guthyl an keth ober;  
ragdho yth os milligys.

Agan tas ha mamm Eva  
lowr ymons i ow mornya.  
Gansa ny vydh ankevys  
an murder bys vynari.

Kemmys yw gansa mornys,  
aga holonn yw terrys  
rag kavow, bedhav y di.

Awos henna ny wrav vri;  
na anedha i bydh moy,  
my ny settyav gwel-gala.  
Genev lowr i a sorras  
hag a'm mollethis mar vras  
na sewenav, gonn yn ta,

nevra y'n bys.  
Rakhenna deun alemma  
yn pellder dhiworth ow thas.  
Y'n koesow mynnav bywa,  
po yn bushes ha brakes bras;  
rag ny besyav bos gwelys  
awos mernans.  
Rag an murder o mar vras  
ny yll Dyw dhymmo gava,  
na ny vedhav yn neb kas  
dhe'n Tas, awos diskudha,  
unnweyth dhe hwilas gevyans.

Yn henna yth os dhe vlamya.  
Dyw a settyas merk warnas,  
ewn yn korn dha dal omma,  
hag yndellma y leveris,  
an geryow ma, dhevri:  
Pynagoll den a wel henna  
hag a wrello dha ladha,  
ev a's tevydh seyth plag moy.

A'n promys my ny rov oy.  
Y drestya ny vynnav vy  
dout bos toellys.  
A-ban yw pub tra parys,  
deun ni yn kerdh kekeffrys,  
pellder a-dro y'n bys.  
Ha'gan fleghes kekeffrys,  
hwath kynth yns i mar vunys.

My a dheg rann war ow heyn.  
Uskis lemmyn!

Gwra yndella, my a'th pys;  
my a led an vow's a'm dorn.  
Ow holonn yth yw terrys,  
that since the time I that I was born  
bythkweth my ny'm beus moy dughan.

Gordhys re bo Dyw an Tas!  
Mab dhymmo yma genys,  
ha tevys dhe baja bras.  
Seth ow mab yth yw henwys.  
Hwi a'n gwel: Otta omma.

My a bys dhe'n lel Drynses  
hedra vo omma y'n bys  
dhe vos lel servont dhodho.

Adam, my a lever dhis,  
dha vab Seth yw dewisys  
genev prest dhe'm servya vy.  
A skians y fydh lenwys,  
hag a gonnyk maga ta.  
Ny vydh skians vydh y'n bys  
mes y aswonn ev a wra  
dre'n an planetys, mes ha chi.  
Der howl ha ster a-wartha  
ev a wra oll dissernya

a'n pyth a vydh wosa hemma,  
kekeffrys a dhrog ha da.

Meur wordhyans dhis, ow Formyer,  
ha gwrier a oll an bys.  
Yth os-ta Arloedh heb par.  
Yn pub plas re bo gordhys.  
Neb a'th enor ny dhrog-far.  
Yn Seth re bo kollenwys  
par dell vo dha vodh nevra  
omma pur grev.

Ha my ynwedh, Arloedh nev,  
a'th lel-wonis dell vo res,  
par dell osta Arloedh krev.  
Hedra vyn omma y'n bys,  
klyw jy ow lev,

ma'm boma gras wosa hemma  
dhe'th weles yn lowender,  
gans dha eledh a-wartha,  
ughel yn nev.

Pes! Goslowewgh, a-derdro,  
orthiv vy myns eus omma.  
Lamek yth yw ow hanow;

mab yth ov, krysewgh dhymmo,  
dhe Vantusale forsooth.  
A Kaym, mab Adam yth ov  
sevys a'n seythves degre.  
Arloedh bras synsys, yn prof.  
Ny'm beus par, sur, yw byw;  
peub a'm enor par dell goedh.

Drog polat ov, re'm lowta.  
Nameur a dorn da ny wrav,  
mes pub eur oll ow pylla  
an dus wann mara kallav.  
Ow fansi yw henna.  
Hwath kynth yw ow hendas Kaym  
pur bad den lowr akontys,  
my a'n kemmer yn disdayn  
mar ny vydhav vy prevys  
hwath meur lakka.  
Moy es unn wreg dhymm yma  
dhe'm plesour rag gul gansa.  
Ha sur my yw an kynsa  
bythkweth a veu dew wreg.  
Ha'n mowesi lowr plenti  
yma dhymm. Nyns yns denti.  
My a's kyv pan vynnav vy;  
ny sparyav anedha i,  
malbew onan a vo teg.  
Saw yth ov wondrys troblys.  
Skant ny welav unn banna.  
P'yw an jowl! Pandra vydh gwrys?  
My ny wonn, war ow ena,  
na hwath ny gavav gweres.

An plesour eus dhymm y'n bys  
yth yw gans gwarak tenna.  
My a vynn mos pur uskis  
dhe'n forest kwykk alemma,  
ha ladha an stranj bestes.  
A'y us kig an bestes na,  
na a vest na lo'n y'n bys  
ny wrussen bythkweth tastya.  
Na hwath kig genen dybrys,  
na gwin ny usyen banna.  
Vytel arall dhyn yma,  
ha pygans lowr dhe vywa.  
Gans kregghyn an bestes na  
my a wra dillas dhymmo,  
par dell wrug ow hendasow.  
Ha'w hendas Kaym, hwath yw fyw  
y'n difeyth; yn mysk bestes  
yma ev prest ow pywa.  
Drefenn serri an Tas Dyw  
tewlys yw dhe veschyf bras,  
rag drog polat par dell yw  
ha lenwys a vollothow.

Ow servont, deus nes omma,  
ha'w gwarak dro hi genes.  
My a vynn mos dhe wandra  
bestes wyls dhe aspia,  
hag a vynn gans ow sethow  
ladha part anedha i.

Agas gwarak ha sethow



genev ottensi parys.  
My a's led bys y'n koesow,  
hag ena y fydh kevys  
plenti lowr, yn pur dhevri.

Gans peub my yw ankevys.  
Ny'm aswonn nameur a dus.  
Kaym my a vydh henwys,  
mab kottha Adam, tewlys,  
hwi a wel, dhe veschyf bras.

Hwath ow holonn yth yw stout  
awos ladha Abel lout.  
Na hwath, 'wos molleth an Tas,  
ny'm beus edrek vydh y'n bys.  
Hwi a'm gwel: overdevys  
yth oma warbarth gans blew.  
Ny besyav bones gwelys  
gans mab-den y'n bys ma byw,  
drefenn ow bos emskemunys.  
Ha'w thas Adam y volleth  
gallas genev, ha'y sorr bras.  
Drefenn henna, yn neb plas  
ny allav kavoes powes.  
Mab mollothow yth ov gwrys.  
Der henna my ny vedhav  
dos yn mysk pobel neb prys,  
mes pub eur owth omwitha  
yn koesow hag y'n bushes,  
avel best prest ow pywa.  
Ow foli yth yw mar vras,

ha'w holonn ynwedh pur brout.  
Ny vynnav dhiworth an Tas  
hwilas mersi, sur heb dout,  
kyn na'm boma lowena.  
Own yma dhymm a bub den,  
ganso dhe vones ledhys.  
Saw an Tas Dyw y honan  
y verk warnav a settyas,  
poran gans y own diwla.  
Hwi oll a'n gwel.

Hag y kewsis yndellma,  
na wra den vydh ow ladha,  
erbynn y dhisplesour lel.

Hag ow ladha neb a wra,  
seyth gweyth y hwra akwitya.  
Y kewsis, gans charj pur grev.  
Saw hwath, 'wos an promys na,  
meur yth esov ow toutya  
y vennath dhymm ny vynn ev.  
Rakhenna, war ow ena,  
my a vynn mos dhe gudha  
yn neb bush, kynth yw dhymm grev.

Mester da, der dha gummyas,  
my a wel unn lo'n pur vras  
yn-hons yn bush ow plattya.

Syrra, yn mysk an bestes  
stranj yth yw ev dhe weles.  
Mirewgh, mester, py 'ma-va.

Bydh war dhymm na vova den,  
rag my ny allav medra.  
Sett ow seth dhe denewenn,  
may hallen tenna dhodho.  
Na berth dout, y fydh e gwyskys.

Nevra na wrewgh hwi doutya,  
ken es best nag yw henna,  
ha stranj yw dhe vos gwelys.  
Now, otta an seth kompes.  
Tenn hi yn-bann bys y'n pil,  
par dell os archer prevys  
hag a ladhas moy es mil  
a vestes kyns es lemmyn.

Now otta an seth tennys,  
ha'n best sur yma gwyskys!  
Y vernans gallas ganso!

Led vy kwykk bys yn dhodho,  
may hallen vy attendya  
pan vaner lo'n yth ywa.

Out, ellas, my yw marow!  
Ny'm beus bywa na fella!  
Gwenys ov der an asow,  
ha'n seth gallas kwit dredhov.

Pur ogas marow yth ov!

Par dell veuma ongrassyas,  
lemmyn yth oma plagyes,  
dell welowgh hwi oll an prov.

Out, ty vilen, pandr' eus gwrys?  
Sur hemma yw den ledhys.  
My a'n klyw prest ow karma.

Ow karma yma an best!  
My a'n gwel ow trebuchya.  
Gallas ganso hager fest!  
Roy y groghen dhymm, I pray thee,  
dhe wul kweth dhymm dhe wiska.

Blewek koynt yw ha hager.  
Ny wonn pan vest ylla bos.  
Yth 'valsa orth y favour  
y bosa neb boekka nos,  
ha henna y fydh prevys.

Gorta, gas vy dh'y dava,  
drefenn gweles mar nebes.  
Pyw osta lavar dhymmo  
mars os den po neb best bras.  
Dout ahanas dhymm yma.

A soweth, emskemunys,  
my yw Kaym, mab dhe Adam.  
Genes yth oma ledhys.  
Molleth dhis dha das ha'th vamm,  
ha'w molleth vy gans henna.

P'ywa! Ty yw Kaym, mab dhe Adam!  
Ny allav krysi henna.  
Di'velebys os ha kamm,  
overdevys oll gans henna  
yth os, gans blew.  
Prag yth os'ta yndellma  
y'n bushes ow krowedha?  
Marth bras yth yw.  
My ny allav konvedhes  
dha vosta jy ow hendas,  
na kar vydh dhymm, yn tevri.

A'm korf yth os devedhys,  
hag a Adam dha hendas.  
Lemmyn yth os milligys,  
ha seythplek ty ha'th flegthes  
a vydh plagyes, krys dhe vy.  
Merk Dyw warnav yw settys.  
Ty a'n gwel yn korn ow thal.  
Gans den pan vo konvedhys  
orthiv vy sertan ny dal  
bos mellys awos neptra.

Ty a wel, veri nebes  
banna ny allav gweles  
dhe vos akontys, re'm lowta.

Prag y hwrug Dyw settya merk  
yn korn dha dal, dhymm lavar?  
Kyn firen warnas mar stark  
ny welav meur a'th favour,  
na merk vydholl y'th tal.

My a lever heb y di:  
genev Dyw a wrug serri  
ha'y volleth, yn pur dhevri,  
dhymm a ros,  
drefenn ladha ow broder.  
Abel o henna. Preder,  
mara mynnta, y wodhvos.  
Der henna, my a dhoutyas  
gans peub y fedhen ledhys.  
Saw Dyw dhymmo a wrontyas -  
war y dhisplesour ev res -  
ny vedhen yn kettella;  
ha pynagoll a wra henna,  
plagyes y fedha ragdho.  
Ha'y verk y settyas omma,  
yn korn ow thal, rag tokyn.  
Ha genes, emskemunys,  
o my dhe vones ledhys,  
ewn a'th tiwla jy lemmyn.

A, soweth gweles an prys  
genev dha vosta ledhys,  
mars yw ty Kaym ow hendas.  
Ow boya o dhe vlamya:  
ev a or'nas dhymm tenna,  
ha my, ny welyn banna

mes nebes, pur wir yn fas.

A Lamek, drogwas yth os,  
ha my ynwedh, meur lakka.  
Hemma o venjans pur vras,  
ha just plag or'nys dhymmo;  
soweth an prys!

Kaym, hwath kynth o'ta ow hendas,  
dha aswonn my ny wodhyen  
na ny wrugav dha weles  
nans yw sur lies blydhen  
drefenn bos di'velebys.

Di'velebys ov pur veur,  
hag overdevys gans blew.  
Ow pywa 'th esov pub eur  
yn toemnder ha yeynder rew,  
sur nos ha dydh.  
Ny besyav gweles mab-den  
gans ow bodh yn neb termyn,  
mes kompani lieskweyth  
a bub best.  
Oll an trobel dhymm yma  
an chorl Abel rag ladha.  
Hemma yw gwir, dhymmo trest.

Prag y hwruss'ta y ladha,  
hag ev dha vroder nessa?  
Henna o gwann-ober gwrys.

Drefenn ev dhe'm kontrolya,  
ha my y vroder kottha!  
Ny wrug revrons dhymm y'n bys!  
Der henna my a angras  
ha pur uskis a'n ladhas.  
Ny'm beus edrek a henna.  
Molleth Dyw ha tas ha mamm  
gallas genev vy droglamm  
poran rag an ober na.  
Ow holonn hwath yth yw prout,  
kynth oma ogas marow.  
Mersi hwilas yma dhymm dout  
dhymmo rag an oberow.  
My a woer y vos Dyw stout.  
Dhymmo ny vynn ev gava,  
na gevyans my ny hwilav.  
Yth esov ow tremena;  
dhisso ny vynnav gava.  
Ow ena ny wonn pyth a:  
dhe ifarn yw y drigva.  
Ena triges, gwav ha hav.

A, soweth gweles an prys!  
Kaym ow hengeugh yw marow!  
Ragdho ty a vydh ledhys,  
a fals lader kasadow!  
Skwatyes yw dha ympynnyon!

Out, ellas, my yw marow,



ha'w fenn skwatyes pur arow -  
hwi a'n gwel - ynter diw rann!

Rakhenna mos alemma  
my a vynn, gwella gallav.  
Ny amont guthyl dughan  
lemmyn ragdho.

Yma Kaym adla marow.  
Deun dh'y hedhes dhe baynow,  
ha'n paja Lamek ganso.

Deus, a ena milligys,  
dha vroder ty a ladhas,  
Abel, neb o den gwiryon.  
Yn tan ty a wra leski,  
ha'n keth paja ma, devri,  
yn ifarn, hwi drog lawen

Y'n pytt ma y hwredh triga  
genev vy, a-barth a-woeles,  
hag a lesk yn toemnder tan.  
Nevra ny dhewgh alena,  
myns na wra bodh an Tas.

Seth, ow mab, dhymm deus omma,  
ha goslow ow derivas.  
Hirneth byw ov y'n bys ma,  
mayth ov skwith a'n lavur bras  
eus dhymmo pub nos ha dydh.  
Rakhenna ke alemma  
dhe baradhis heb lettya,  
ha'n Oyl a Versi hwila  
mar kylllydh, awos neb tra.  
Na dhout, gorthyp ty a vydh  
oll a'th negys.

A das ker, ny wonn for' dhi,  
na ny veuv bythkweth ena.  
My ny allav prederi  
pana gwartron yth a-ma,  
syrr, dhe hwilas paradhis.

Gwith yn hons kompes dhe est.  
Na gemmer dout na mystrest  
mes an for' a vydh kevys  
y'n vaner ma.  
Ty a wel olow ow threys  
pan dheudh vy a baradhis  
ewn y'n veri prynt leskys  
pan veu an nor milligys  
der ow oberow ena.

Ha pan dheffesta dhe'n plas,  
ty a gyv y'n yet unn el  
a ro gorthyp dhis y'n kas,

ha'w desir ny wredh fyllel.  
Bydh avysyes a bub tra  
a welydh, ow mab, ena.

Ow thas ker, mos alemma  
my a vynn, y'n by-and-by,  
hag y tov dhy'hwi arta  
gans gorthyp, kyns es hedhi,  
der bodh an Tas a-wartha.

My a wel ol treys ow thas,  
a'm led vy dhe baradhis.  
Hemma yw marthusyon bras.  
An nor sur ny sewenas  
y'n for' may hwrug ev kerdhes.  
Der temptashyon bras an jowl,  
chassyes on a baradhis,  
mayth eth genen hager dowl,  
ha dhe veschyf bras koedhys  
yth en der ordyr an Tas.  
Tru, go-vy.

My a wel an plas gloryus  
ha'n el y'n yet ow sevel,  
splann dhe weles ha preshyous.  
My a vynn mos pur uvel  
ewn dhodho, dh'y salusi.

El Dyw an nev a-wartha,  
dhis lowena ha meur joy!

Devedhys yth ov omma  
gans Adam ow thas dhy'hwi,  
yndella mar pewgh plesys.

Seth, deus nes, ha dhymm lavar  
dha negysyow heb danjer  
ha na gemmer own y'n bys.

Ow negys yth yw hemma:  
dhe hwilas Oyl a Versi.  
Charjyes yth ov yndella  
gans ow thas omma dhy'hwi,  
agas bodh mars yw henna,  
rag yth yw ev koth gyllys,  
hag y'n bys ma nans yw skwith.  
Y drobel yth yw kemmys  
hwansek nys yw dhe dravydh,  
mes pub eur ma ow kria  
war-lergh an Oyl a Versi.

Deus nes dhe'n yet, Seth, ha mir.  
Ty a wel oll paradhis.  
Avis pub tra, ha lavar  
pandr'a welydh a strangeness  
y'n jardin a-barth a-ji.

Agas bodh mars yw henna,  
my a vynn skon avisya  
an marthusyon eus ena.

Lemmyn, Seth, lavar dhymmo

a-bervedh pandra wel'ta.  
Na wra keles unn dra.

My a wel sur unn wydhenn,  
ha serpont ynni a-vann.  
Marow sygh hi a 'valsa.

Honna yw an keth wydhenn  
a wrug kyns dha vamm ha tas  
dybri an aval a anken  
o difennys gans charj bras  
a anow an Tas Gwella.  
Ha'n serpont na a wel'ta  
yth yw an veri pryv na  
a wrug an jowl dhe entra  
ynni hi rag temptya  
dhe'th vamm Eva.  
Der henna, Dyw a sorras,  
ha dhe vy ev a or'nas  
alena aga chasya.  
Lavar pandra wel'ta moy.

My a wel goodly wydhenn  
ha'y thopp pur ughel yn-bann.  
Bys yn nev 'ma ow tevi.  
Ha'y gwreydhyow dhe'n dor isel  
yma ow resek, pur lel,  
bys yn ifarn, pytt pur grev.

Hag ena ow broder Kaym  
my a'n gwel ev yn meur bayn,  
hag yn trobel mayth yw gwev.  
Hag yn topp an keth wydhenn

my a wel unn magteth hweg  
ow 'sedha, yn pur sertan,  
hag yn hy diwvronn flogh teg,  
dell hevel dhymm yndella.

My a lever dhis diblans:  
honna (lel yth yw henwys)  
yw an Wydhenn a Vywnans.  
My a hedh rann a'n frutys,  
hag a dhro part anedha,  
aval pur vras.  
Mir, ottomma teyr sprusenn  
a dheuth mes a'n aval ma.  
Kemmer i ha gorr yn-bann  
yn neb tyller dhe govva,  
ha dog i genes dhe'th tas.  
Pan vo diwedh y dhydhyyow,  
hag y'n dor dhe vos ynkleudhys,  
gorr sprusenn yn y anow,  
ha'n dhiw arall kekeffrys,  
bedhens gorrys yn y dhewfrik.  
Hag y tyv a'n keth sprus na  
unn wydhenn wosa hemma,  
na berth dout, a vydh pur deg.  
Ha pan vo hi kowl-devys,  
hi a vydh pub eur parys  
dhe dhoen an Oyl a Versi.  
Pan vo pyp mil ha pyp kans  
a vlydhynyow kler passyes,  
y'n eur na gwaytyes dihwans

war-lergh Oyl Mersi pup-prys,  
ha Salvador yn tevri  
a'n doro mes a baynys.  
Lavar dhe'th tas yndella,  
ha dhodho yth yll trestya.  
Yndellma yth yw 'poyntys.  
Fisten dihwans alemma.  
Ow bennath dhis.

Meur a ras dhy'hwi, el Dyw,  
ow tiskwedhes dhymm pub tra.  
Dh'ow thas ker oll par dell yw  
my a vynn sur y dhyska;  
an marthusyon dell yw bras.  
My a vynn mos alemma  
yn hanow Dyw a-wartha,  
dhe dre dhe Adam ow thas.

Lowena dhy'hwi ow thas!  
Devedhys a baradhis  
yth ov lemmyn, dhe Dhyw gras.  
Ow negysyow yth yw gwrys,  
par dell wrussowgh dhymm or'na

Wolkomm os, Seth, genev vy.  
Pana nowedhys eus genes?  
Mars yw an Oyl a Versi  
dres genes omma dhe'th tas  
pur lowen my a via.

Nag yw hwath, ow thas, forsooth.  
My a lever dhywgh, dell goedh,  
an gwiryonedh a bub tra.  
Pan dheffo an termyn playn  
a bymp mil ha pymp kans vlydhen,  
an Oyl a Versi nena  
a vydh kevys.

Yn paradhis y hwelis  
dyffrans marthusyon, heb dout;  
speshyal unn wydhenn loryus  
ow hedhes yn-bann pur stout  
bys yn nev, sur my a grys,  
ha'y gwreydhyow dhe'n dor isel  
bys yn ifarn ow hedhes,  
hag ena, pur wir heb fall,  
yth esa yn trobel bras  
ow broder Kaym, yn paynys.  
Now yn topp an wydhenn deg  
yth esa unn virgin hweg,  
ha'y flogh, pur semli maylyes  
yn hy diwvronn, wondrys hwans.

Gordhys re bo Dyw an Tas,  
ow ri dhymm an nowedhys!  
Sur ny'm beus bys vydh mar vras  
nans yw termyn tremenys  
a vlydhynyow moy es kans.

My a welas gwydhenn moy  
ha serpont yn-bann ynni.  
Marow sygh hi a 'valsa.



Honna o drog bryv, heb namm,  
a doellas Eva dha vamm.  
Der henna y kellsyn jam  
joys paradhis rag nevra.

Ottomma teyr sprusenn, dres  
mes a baradhis dhy'hwi.  
A aval y fons terrys  
a dheuth a'n wydhenn, devri,  
yw henwys Gwydhenn a Vywnans.  
An el a or'nas dhymmo,  
pan vo diwedh dhe'th tydhyow  
ha'th vos gyllys alemma,  
gorra sprusenn y'th hanow,  
ha'n dhiw arall pur dhiblans  
yn dha dhewfrik.

Mes a'n sprus y fydh tevys  
gwydhenn a vydh pur breshyous  
wosa henna, marthys teg  
yn pur dhevri.  
Ha pan vo hi kowl devys,  
hi a vydh pub eur parys  
dhe dhoen an Oyl a Versi

Meur wordhyans dhe'n Drynses Tas  
ow krontya dhymmo selwyans,  
wosa hemma kynth yw pell.  
Seth ow mab, goslow dhymmo,  
ha dha jarjya my a wra  
yn-dann ow bennath, pur lel.  
Gwayt an Tas a Nev gordhya,  
ha pub eur orto koela

yn pub edhomm y fes-ta.  
Ev a wra sur dha sokra,  
hag a vynn dha ventena  
y'n bys ma pell dhe vywa.  
Ow mab, merk an geryow ma.

A das ker, meur ras dhy'hwi  
a'gas dyskans da pub prys  
My a goedh yn pur dhevri  
gordhya Dyw an lel Drynses,  
ha'n Mab gwella,

ha'n Spyrys Sans, aga thri.  
Dell yns onan, my a grys  
tri ferson yns, pur wordhi,  
ow kesreynya yn joyys  
yn Gwlas Nev eus a-wartha.  
ha rakhenna y koedh dhymmo  
gans kolonn bur aga gordhya.

Koth ha gwann yth ov gyllys.  
Ny'm beus bywa na fella.  
Ankow yth yw devedhys.  
Ny vynn omma ow gasa  
dhe vywa omma unn spys.  
My a'n gwel prest gans gyw,  
parys dhe'm gwana pub tu.  
Nyns eus skapya dhe-vy.  
A'n prys mall yw genev.  
My a servyas pell an bys,  
a-ban veuma kyns formys.

Naw kans bloedh ov, my a grys,  
ha deg warn ugens, reknys,  
mayth yw prys mos alemma.

Fleghes a'm beus dineythys  
a Eva ow fries, meur,  
dewdhek warn ugens genys  
a vebyon, hemma yw gwir,  
heb ow mab Kaym, hag Abel.  
Ynwedh dewdhek warn ugens  
a vyrghes yn pur dhiblans  
my a'm beu, heb toell na gil,  
a dhallevhos an bys ma.  
Ha'n bys yth yw ynkressys  
dredhov vy hag ow fleghes  
heb nomber dhe vos komptys.  
Dhe Dhyw y hwonn gras ragdha.

Adam, gwra dhymmo parys.  
Ty a'm gwel vy devedhys  
dha vywnans gans ow spera  
dhe gemmeres alemma.  
Nyns eus gortos na fella;  
rakhenna gwrav dha wana,  
der an golonn mayth ello.

Ankow, y hwonn dhis meur ras  
ow bywnans dhe gemmeres  
mes a'n bys ma,  
rag pur skwith ov anodho.  
Dhe Dhyw y hwonn gras ragdho.

Gwynn ow bys bos dhymm fethys  
lavur ha dughan an bys.  
Pell my re'n servyas omma.  
Ha rakhenna gwrav kemmynna  
dhe'n lel Drynses ow ena.

Kowetha, bedhewgh parys,  
an dhewolow pub onan!  
Ena Adam tremenys  
deun dh'y hedhes dhe'n gegin,  
dhe'n pytt down barth a-woeles.

Na, na, ny wredh yndella!  
Yma ken or'nys ragdho.  
Yn lyombo barth a-wartha  
ena ev a wra triga,  
dell yw or'nys gans an Tas.  
Ty a woer yn ifarnow  
yma manshyons, heb gow,  
neb yma an dhewolow  
a dheuth mes a nev golow  
genev vy ow toen rewl vras.

An chorl Adam y drigva  
a vydh a-barth a-wartha,  
yn onan a'n kloysters na  
neb na vydh tamm lowena,  
mes yn tewolgow bras ena,  
ow kelli presens an Tas,  
ha'n moyha payn a vydha  
y vab Kaym. Yn paynys bras  
ev a drig bys vynytha.  
Yma ev barth a-woeles

yn pytt down ow leskya.

Praga na vydh an chorl Adam  
yn kettella tormentys?  
My a wra dhe'n horsen kamm  
bos kalessa prisonys  
mar kallav, kyns es hedhi,  
drefenn terri gorhemmynn.

My a lever dhis an kas.  
Kyn hwrug Adam pegh mar vras,  
ev a'n jeva edrek tynn,  
ha Dyw dhodh' ev a avas  
y dhisplesour ha'y sorr bras,  
hag yndella ny wrug Kaym.  
Ev a ladhas y vroder  
ny gemmeras edrek vydh,  
mes y rejoyssyas pur veur,  
hag a sorr an Tas travydh  
yn sertan ev ny synsis.  
Rakhenna bys vynari  
ev a dryg ena devri  
yn paynys bras, avel ki.  
Joy nev yw dhodho kellys.  
Eya, Kaym ha'y gowetha  
y'n keth ordyr a vywa  
an plas yw or'nys ragdha,  
yn ifarn barth a-woeles.  
Hag Adam, venjans dhodho,  
lymbo yw or'nys dhodho.  
Ya, ragdho ev ha'y gowetha  
ny dastyons an payn bras.

Yth'oll agan viaj ni,  
re'n jowl bras, ny dalvydh oy!  
Triges an chorl neb yma.  
Deun ni warbarth, a gowetha,  
dhe ifarnow alemma,  
dhe'n paynys a dhur nevra.

A ena Adam dremas,  
deus genev dhe ifarnow.  
Ena or'nys dhis yw plas  
gans an Tas, dhis, heb gow,  
dhe remaynya rag seson.

Pan dheffo an Oyl a Versi,  
ty a vydh kyrghys dhe'n joy  
dhe'n nev ughel a-ughon.

Ow thas pan ywa marow  
my a vynn y ynkleudhyas.  
Deun alemma heb falladow;  
gorryn an korf y'n gweres  
gans solempnyta ha kan.  
Mes a'n dor ev a veu gwrys,  
hag arta dhe'n keth gweres  
ev a vydh treylyes sertan.  
Ha dell veu dhymm kyns or'nys,  
an deyr sprusenn yw gorrys  
yn y anow ha'y frigow.

Dell o ev an kynsa den  
a veu gans an Tas formyes,  
y'n bedh otta ev lemmyn.  
Dhe'n Tas Dyw re bo grassyes  
omma rag y oberow.

Enok yth yw ow hanow,  
lel servont dhe'n Trynses Tas.  
Mab Jared yth ov, heb gow.  
Sevys a linyeth pur vras  
heb dout yth ov.  
Ha, pur lel, an seythves degre  
dessendys a Adam ov.  
Yn oes my yw y'n eur ma  
tri hans tri ugens yn prov,  
ha hwath pyp moy, pan eus dhymm kov,  
y'n jydh hedhyw.  
My a bys dhe wrier nev  
may fen pub eur plegadow  
dhe vones y servont ev  
y'n bys ma heb falladow  
hedra ven byw.

Enok, my a lever dhis  
ow bodh dhe vos yndellma:

may festa kwykk transformys.  
Dhe baradhis alemma  
my a vynn may fes uskis  
hedhys yn korf hag ena.  
Bydh parys y'n termyn ma.  
Hag ena y hwres gortos  
ogas dhe worfenn an bys.  
An mysteri yth yw pur vras;  
genev ny vydh disklosyes  
dhe dhen vydholl y'n bys ma.

Gordhyes re bo Dyw an Tas!  
Dha volonjedh re bo gwrys!  
Hemma yth yw marthusyon bras.  
Yth esov ow pos gorrys  
ny wonn py le!  
My a woer hag a lel grys  
gwrians Dyw y vos hemma.  
Devedhys dhe baradhis  
my a woer gwir yth oma.  
Plas delysyous yw hemma.  
Pellder ynno my a vyw.  
Der demptashyon an tebel  
ow hendas Adam, pur wir  
ev re gollas, der aval,  
an plas gloryus pur sur,  
mayth yw gwev oll dh'y yssew.  
Rakhenna, pobel an bys,  
na wrewgh terri an difenn  
a vydh gans Dyw dhywgh or'nys,  
dout dhe gavoës drog worfenn



ha meschyf bras war bub tu.  
Mara kwrewgh orthiv koela  
hwi a's bydh wosa hemma  
joyys nev yn unn rew.

Kemmys peghes eus y'n bys  
gwrys gans tus heb amendya,  
mayth yw Dyw an Tas serrys  
bythkweth gul mab-den omma.  
Dystruksyon yma or'nys  
pur sertan war oll an bys,  
may fydh konsumys pub tra.  
Henna yth yw konvedhys  
der an dyskans eus dhymmo res  
gans an Tas eus a-ughon.  
An planetys eus a-wartha,  
ha'n ster ynwedh maga ta,  
ow poyntya 'mons pur efan.

An howl ha'n loer kekeffrys,  
oll warbarth yw konvedhys,  
dhe'n porpos na 'mons ow tos.  
Ha'n dystruksyon a vydh bras,  
may fydh an bys distruys  
der livyow a dhowr pur vras,  
po der dan y fydh leskys.  
Krysewgh dhymm mars owgh hwi fur.  
Rakhenna gwres tus doutya  
an Tas Dyw dhe offendya

der neb maner for' y'n bys.

Rag voydya an peryll na,  
skrifys yma dhymm pub tra  
a dhallevhos an bys ma,  
may fova lel rekordys  
a vyns tra eus ynno gwrys.

An lyvrow ottensi omma.  
Hwi a's gwel, wondrys larjya,  
ha pub tra oll y'n bys ma  
skrifys yma yn re ma,  
dout na vons i ankevys.

Dew bilar mynnav 'poyntya  
rag an porpos na hware.  
Brykk a vydh onan anedha,  
ha marbel a vydh y gila.  
Rag sawment i a vydh gwrys  
dhe'n lyvrow.

A'n brykk rag na vons leskys  
der dan vydh, henna yw gwrys,  
ha'n marbel tamm konsumys  
der dhowr ny vydh, hemm yw gwrys,  
drefenn y vos men garow,  
wondrys kales.

An pilars yth ons parys.  
Gorrewgh ynna an lyvrow.

Nyns eus art vydh ankevys,  
na tra arall, sur heb wow,  
mes ynna ymons skrifys.  
A bub sort oll a lyvrow  
ekwal ynno yw gorrys.  
Kepar yth yw an sortow  
gorrys ynna der dhevis,  
yn dyffrans ha kehaval.  
Lemmyn my a's gorr yn-bann,  
hag y'n eyl sur bys vykken  
an rekord a vydh heb fall  
pur wir kevys.

Rakhenna, pobel doutyens,  
ha dhe'n Tas gwren oll pysi  
na 'skynno an keth venjans  
yn neb termyn warnan ni  
na'gan fleghes.

Drog yw genev guthyl den,  
preshyous haval dhe'm honan.  
Rag koela orth unn venyn  
glan ev re gollas y blas  
a'm leuv dheghow a wrussen.  
Pan wruga dres ow difenn  
mes a baradhis pur lan  
hware an el a's gorras.

An spyrys ny dryg nevra  
yn korf mab-den vydh y'n bys,  
ha reson yw ha praga,  
rag y vos kig medhel gwrys  
ha pur vrottel gans henna.  
Nyns eus den orth ow servya  
len ha gwiryon sur pub prys  
saw Noy yn oll an bys ma,  
ha'y wreg ha'y fleghe keffrys.  
Ow bodh yth yw yndella:  
gul dial war oll an bys  
may fydh pub tra konsumys,  
mes sertan mynnav sawya.

Noy, mab Lamek, gelwys ov.  
Arloedh bras, oll perthewgh kov,  
yth ov, omma y'n bys ma.  
Substans lowr a byth ha da  
yma dhymmo dhe vywa,  
mayth ov synsys rag nevra  
dhe wordhya ow Arloedh da,  
an Drynses eus a-wartha.

Noy, deus dhymmo vy lemmyn,  
ha goslow dhymm a gowsav.

Parys ov, Arloedh bryntin.  
Dha volonjedh lavar e.

Noy, mar lenwys yw an bys  
lemmyn a sherewynsi  
mayth yw diwedh devedhys  
ynno a gik pub huni.  
Gans pegh pur wir yw flerys.  
Ny allav sparya namoy  
heb guthyl mernans a verr spys  
war bobel oll marnas ty  
ha dha wreg ha dha flegthes,  
ha'n pyth a long dhisso jy.  
Rakhenna fisten, ke, gwra  
gorhel a blenkys playnys,  
hag ynno lies trigva.  
Roumys i a vydh henwys.  
A-ves hag a-ji yn ta  
gans pyg bedhes stancha gwrys,  
ha tri hans kevelin da  
an lester a vydh yn hys,  
ha hanterkans kevelin  
ynwedh ty a wra yn les,  
ha'n ughelder my a vynn  
deg warn ugens may fo gwrys.  
War-tu a-dhelergh daras  
ty a wra. Port ev a vydh henwys.  
Jistys dredho ty a blas,  
a-les rag na vo diges.  
A bub eghenn a ginda  
gorow ha benow ynwedh,  
aga gorra ty a wra  
yn dha lester a-bervedh.  
Pub maner boes y'n bys ma  
eus dhe dhybri gwayt may tredh;  
rag den ha best maga ta.  
Yn dha lester gwayt may fydh.

Arloedh krev, dha arghadow  
my a wra, so mote I go!  
Ow lithyow, heb falladow,  
my a vynn dalleth strechya.

Gans ow boel nowydh lymmys  
my a skwat pub pis tymber,  
hag a blayn oll an plenkys,  
ha'ga sett pub plenkynn sur.

My a galk dhywgh wondrys fin  
nag ello dower vydh ynno.  
Kyn fo-va gwriys a o'erbyn  
y fydh stanch, my a ragdho.

Yma pyg dhymm proviys,  
ha lovanow pub eghenn.  
Dyffrans sortow a wernow  
yma parys pur efan.

Marth yw genev a unn dra,  
y vos-ta mar wokki, Noy.  
Praga yw genes jy omma  
byldya lester mar wordhi  
yn kres pow, dhiworth an mor?  
My a syns dha skians hwath  
dhe vos. Yn kost a'n par na  
oll dha lavur ny dal kath,  
my a'n te war ow ena!

Gokki yth os.

Ow hothman, na gemmer marth.  
Ty a'n oel, ha lies mil.  
Kynth o'ta 'skynnys yn hwarth,  
y'n diwedh, heb toell na gil,  
hwi a wel dial uskis.  
Gwarnys ov gans Dyw an Tas  
dhe wuthyl an lester ma,  
rag ow sawya ha'w flegthes  
dhiworth an keth dial na.  
Hwi a wel a-ji dhe spas.  
Der livyow a dhowr an brassa  
oll an bys a vydh beudhys.

Gwell via a ves-ta kregys,  
ty hag oll a'n kryjyans na!  
A jorl koth, ty benn-pilys,  
fatla vynnta jy henna;  
y fydh an bys konsumys?  
Oll an dowrow y'n bys ma,  
kyn fons warbarth kuntellys  
ny wra diwedh a'n par na!  
Saw yth o'ta jy gokki  
oll an bys a yll godhvos.  
Venjans war dha benn-kreghi!  
Nyns eus omma den y'n wlas  
a grys dhis malbew vanna.

Praga, pandr'yw an mater?  
A vynn Dyw beudhi an bys?  
Mara ko'sta, dhymm lavar  
an okkashyon, my a'th pys,  
der vaner da.

An okkashyon yw hemma.  
Kemmys peghes eus y'n bys,  
ha nyns eus tamm amendya,  
mayth yw an Tas Dyw serrys  
gans oll pobel a'n bys ma.  
Hag edrek dhodh' ev yma  
bythkweh mab-den dhe vos gwrys.  
Rakhenna gwreugh amendya;  
a'gas foli bydh neghys.  
Y'n eur na, der vaner da,  
mara pydhowgh repentys,  
an keth plag a wra voydya.

Piw a'th gwrug jy pregowther  
dhe dhyski omma dhyn ni?  
Y praydha dhymmo lavar,  
a wrug Dyw kewsel dhe-jy  
only, heb den arall vydh omma?  
My a woer yma y'n pow  
lies den a gews a'n Tas,  
tus perfeyth, my a'n avow,  
yth yns i, ha polatys bras,  
a wayt bos yn favour Dyw.  
Syrre, dhe rann a'n re na  
ev a vynnsa disklosya  
an dystruktyon bras ha'n liv.



Rakhenna dhisso krysi  
my ny vynnav moy es ki.  
Na 'mendya ny vynnyn ni,  
awos dha eryow wastyes.

Da yw dhisso jy bos fur,  
hag oll pobel a'n bys ma.  
Ny vydh Dyw nevra pur wir  
kevys gowek, trest dhymmo.  
Ragdha bedhewgh avisyes.  
Mar ny wrewgh, venjans pur vras  
a 'skynn warnowgh kyns nep-pell,  
rag Dyw a vynn, agan Tas,  
dannvon liv a dhowr pur lel,  
sertan dhe veudhi an bys.  
Rag omsawya ow honan,  
keffrys ow gwreg ha'w flegghes,  
an lester a vydh genen  
der weres Dyw uskis gwrys,  
rag voydya an danger ma.

Tetivali, bramm an gath!  
My ny grysav dhisso hwath,  
y fyynn Dyw gul yndella.

My a woer. Ny wrug an bys  
ha'n bobel myns eus ynno  
dhe vos mar gwykk distruys.  
Anpossybyl yth ywa  
an dower na dhe vos kevys.

Anpossybyl nyns yw tra  
dhe Wrier oll an bys ma,

awos distrui an bys  
a-ji dhe our.  
Rag der er oll a veu gwrys,  
nev ha nor, myns eus omma,  
ha der er arta, dhymm krys,  
ev a yll, mara mynna,  
y dhistrui der an dour.

Ny amont dhymmo resna  
genes, Noy, my a hevel.  
My a vynn mos alemma,  
rag yth o'ta drog ebel  
na vynn nevra bones 'vas.

Purra fol ny veu gwelys.  
My a lever dhis praga.  
An lester yw dallethys,  
hwi a woer, nans yw polta,  
a vlydhynyow pur lies -  
moy es ugens  
rag mar vras yw dallethys  
nevra ny vydh diwedhys.  
My a'n te war ow honshyans.

Now an lester yth yw gwrys,  
teg ha da dhe'm plegadow.  
A bub eghenn a vestes  
drewgh hwi kwykk dhymm orth koplow  
chatel, ydhyn, kekeffrys,  
dew ha dew, benow ha gorow.

Nyns eus best na pryv y'n bys,  
benow ha gorow omma,  
genev dhy'hwi nag yw dres.  
Y'n lester y tons ena.

A das, lemmyn gwrewgh parys.  
An liv nans yw devedhys!  
Yma lower den y'n bys  
kyns lemmyn sur gewsis  
agas bos hwi gokki.  
Pan wrussowgh gul an lester  
omma prest yn kres an tir,  
mor vydh nyns esa, devri,  
dh'y doen yn kerdh.

Ges a wrussons anodho.  
Dout sorr Dyw nyns esa  
dhedha nena, my a woer gwir.

An liv nans yw devedhys,  
mayth yw da dhyn fistena.  
Pub best oll yma gyllys  
y'n lester dh'aga hinda  
dell yw or'nys dhymmo vy.

Kewgh a-bervedh, ow flegghes,  
ha'gas gwragedh maga ta.

Ogas an nor yw kudhys  
der an glaw eus a-wartha.  
Ty, benyn, a-bervedh deus.  
Ow! dar! beudhi a vynn'ta?

Res yw sawya an pyth eus.  
Ny'n dal dhymm tewlel dhe ves.  
Da yw dhyn aga sawya.  
Y kostyons showr a vona,  
an keth taklow eus omma.  
Noy hweg, ty a woer henna.

Nans yw meur a for', pur wir,  
a-ban kellsyn syght a'n tir.  
Rakhenna dhymm, ke bran vras,

nij yn kerdh lemmyn ha mir  
tiredh mar kyll bos kevys,  
hag an golomm yn pur sur  
my a's dannvon pur uskis,  
syght an nor mar kyll gweles.

Marow yw pub tra esa  
spyrys a vywnans ynno.  
My a worhemmynn hware  
dhe'n glaw namoy na wrello.

Dhe'n Tas Dyw re bo grassyes!  
An golomm yw devedhys,  
ha gensi branch oliv glas.

Arall bedhes delivrys.  
Dos ny vynnas an vran vras.  
Neb karyn hi a gavas.  
Nans yw ogas ha blydhen  
a-ban dhallathas an liv.  
Mars yw bodh Dyw y honan,  
neb yw Gwrier nor ha nev,  
dhe slakya an keth liv bras,  
y vodh re bo kollenwys  
omma genen ni pub prys,  
kekeffrys ha mab ha tas.

Noy, my a worhemmynn dhis,  
ke yn-mes a'n lester skon,  
dhe'th wreg ha'th flegthes keffrys,  
ydhyn, bestes, ha pub lo'n.

Meur wordhyans dhis, Arloedh Nev.  
Ty a weres gwann ha krev  
yn edhomm, sur, pan vo res.  
Deun yn-mes, byghan ha bras,  
chatel, ydhyn ha bestes;  
myns a veu y'n lester dres.  
Yn dehwelans peghosow  
gwruthyl alter my a vynn.  
My a vynn guthyl kanow,  
ha sakrifis(a) lemmyn  
rann eghenn a bub sortow,  
keffrys bestes hag ydhyn,  
gans henna dh'y enora.

Ha rag henna gwren ni kana  
yn gordhyans dhe'n Tas omma.

Hemma yth yw sawer hweg,  
hag ynwedh sakrifikis da.  
Pur wir Noy, ev dhymmo a bleg,  
a leun golonn pan ywa  
dhymmo vy gwrys.  
Rakhenna sur my a wra  
bynytha wosa hemma  
y'n ebrenn y fydh gwelys  
an gammneves yn dhevri.

Peskweyth may's gwelav vy hi,  
remembra ahanowgh hwi  
my a wra bys vynari,  
trest jy dhymmo.  
Dystruksyon vydh a'n par na  
bynytha der dhowr ny wrav,  
'wos distrui an bys ma.  
Ha rakhenna

kressyewgh, kollenwewgh keffrys  
an norvys a dus arta.  
Pub edhen ha best y'n bys,  
puskes y'n mor maga ta,  
a vydh dhywgh sosten omma.  
Nyns eus tra y'n bys ma gwrys  
mes dhy'hwi a wra servis.  
Bedhewgh war na vo ledhys

mab-den genowgh hwi neb prys.  
Ha mar pydha yndella,  
my a vynn y rekwirya  
a dhiwla an keth den na  
y woes a dheu ha skoellya.  
Yn haval dhymmo omma  
imaj den gwruga shapya.  
Mara'm kerowgh dell goettha  
hwi a wra orthiv koela.

Ni a vynn gul yndella,  
dell ywa devar dhyn ni,  
ha dha wordhya rag nevra,  
par dell yw agan duty.

An keth jorna ma yw de,  
dhe'n Tas Dyw re bo grassyes.  
Hwi a welas, pub degre,  
lies maters gwariys,  
ha kreashyon oll an bys.  
Ynwedh oll hwi a welas  
an keth bys ma konsumys  
der livyow a dhowr pur vras.  
Ny veu unn mab-den sperys,  
marnas Noy, y wreg, ha'y flegthes.  
Dewgh a-vorow a dermyn.  
Hwi a wel maters pur vras,  
ha redempshyon grontys  
der versi a Dhyw an Tas,

dhe sawya neb eus kellys.  
Mynstrals, gwrewgh dhyn ni piba,  
may hallen warbarth donsya,  
dell yw an vaner ha'n gis.